



BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE  
**PREDSTAVNIČKI DOM**

Broj:01-011-539/01

Sarajevo, 09.oktobra 2001.

**Z A P I S N I K**

sa 14. sjednice Predstavničkog doma Parlamentarne skupštine Bosne i Hercegovine,  
održane 09.oktobra 2001.godine

Četrnaestoj sjednici predsjedavao je dr. Željko Mirjanić, koji je dužnost predsjedavajućeg Doma preuzeo 29.avgusta 2001.godine.

Sjednica je s radom počela u 11,40 sati. Prisustvovalo je 40 poslanika – 27 Federacije BiH i 13 iz Republike Srpske. Odsustvo su opravdali Branislav Lolić i Bahrija Osmanović, zbog službenog puta.

Pored poslanika, sjednici su prisustvovali predsjedavajući Vijeća ministara Zlatko Lagumdžija, ministri Svetozar Mihajlović, Krešimir Zubak, Dragan Mikerević i Ante Domazet, te zamjenici ministara Gordana Ković, Milovan Blagojević, Jadranko Prlić i Rasim Kadić. Sjednici su takođe prisustvovali: ispred Ureda za reviziju poslovanja institucija BiH glavni revizor Ivan Miletić; direktor Državne granične službe Slaviša Vuković i viceguverner Centralne banke BiH Dragan Kovačević.

Iz međunarodnih organizacija 14. sjednici su prisustvovali: Jan Peter Hotedal, predstavnik OHR-a, Marsali Fraser i Nina Šandrk – ispred OSC-a, Clem Capel – predstavnik Posmatračke misije Evropske unije i Daniela Mićanović – ispred Evropske komisije.

Predsjedavajući Željko Mirjanić na početku sjednice zahvalio se na korektnoj saradnji dr. Seadu Avdiću, prethodnom predsjedavajućem Doma, a potom u ime Kolegija predložio da Dom prije prelaska na rad po prijedlogu dnevnog reda, kao prethodno pitanje verifikuje poslanički mandat Franji Majdandžiću, kojeg je predsjedavajući Privremene izborne komisije, ambasador Robert Bikroft, imenovao za novog poslanika sa liste Stranke za Bosnu i Hercegovinu.

Davanjem svečane izjave pred Domom poslanik Franjo Majdandžić je preuzeo poslaničku dužnost.

Pred Domom je svečanu izjavu dao i Ante Domazet, ministar za trezor institucija Bosne i Hercegovine.

Poslije davanja svečane izjave predsjedavajući Mirjanić je dao neophodne napomene u vezi s prijedlogom dnevnog reda i iznio određene izmjene u odnosu na prijedlog koji su poslanici ranije dobili, a koje je Kolegij u međuvremenu usaglasio. Potom je prijedlog dnevnog reda dao na diskusiju.

U diskusiji su učestvovali:

Osman Brka – u ime Kluba poslanika SDA predložio da Dom raspravlja o obilježavanju Dana državnosti BiH, a povodom Prijedloga zakona o državnim praznicima Bosne i Hercegovine koji je u Domu naroda predložio Sejfidin Tokić, mimo saglasnosti bošnjačkih delegata. Obrazlažući ovaj prijedlog poslanik Brka, pored ostalog, postavio je pitanje Alijansi za promjene – jesu li to promjene koje je najavljivala u predizbornoj kampanji.

Bogić Bogićević je, odgovarajući na prijedlog Osmana Brke, pored ostalog, rekao da je ovo Predstavnički dom, a ne Dom naroda, i da će o Zakonu o praznicima raspravljati ovaj dom kad dođe na dnevni red.

U vezi s prijedlogom Osmana Brke dalje su diskutovali Sead Avdić, Mirko Banjac i Adem Borić.

Poslije diskusije predsjedavajući je na glasanje dao prijedlog Kluba poslanika SDA-da se u dnevni red uvrsti rasprava o obilježavanju Dana državnosti Bosne i Hercegovine.

Za prijedlog je glasalo 8 od 38 poslanika. Protiv je glasalo 9, a uzdržalo se 18 poslanika.

Predsjedavajući je konstatovao da prijedlog za dopunu dnevnog reda nije usvojen, te da je za 14.sjednicu Predstavničkog doma ostao slijedeći

### **D N E V N I R E D:**

1. Usvajanje Zapisnika sa 13.sjednice Predstavničkog doma,
2. Poslanička pitanja i odgovori,
3. Izvještaj Komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o izbjeglicama iz BiH i raseljenim osobama u BiH,
4. Izvještaj Komisije Kolegija o nastojanju za postizanje saglasnosti o Prijedlogu zakona o međunarodnom i međuentitetskom drumskom prijevozu,
5. Prijedlog zakona o industrijskom vlasništvu u BiH (prvo čitanje),
6. Prijedlog zakona o vanjskotrgovinskoj komori (drugo čitanje),
7. Izvještaj o izvršenoj reviziji godišnjih računa za 2000.godinu:
  - a) Ministarstva civilnih poslova i komunikacija,
  - b) Ministarstva vanjskih poslova,
  - c) Ministarstva vanjske trgovine i ekonomskih odnosa,
8. Izvještaj o radu Državne granične službe BiH u periodu 1.01.-30.06.2001.
9. Izvještaj Centralne banke BiH za 2000.godinu,
10. Informacija o organizaciji i kadrovskoj situaciji u DKP mreži MVP BiH,
11. Popunjavanje upražnjenih mjesta u Komisijama Doma (Komisije za finansije i budžet, Administrativne komisije i zajedničke komisije oba doma za postizanje saglasnosti o tekstu Zakona o izmjenama i dopunama Zakona o vanjskom dugu,
12. Davanje saglasnosti za ratifikaciju:
  - a) Drugog amandmana Sporazuma o grantu između Sjedinjenih Američkih Država i Bosne i Hercegovine za program reintegracije i stabilizacije zajednice,
  - b) Sedmog amandmana na Ugovor o bespovratnim sredstvima između Bosne i Hercegovine i Sjedinjenih Američkih Država o programu za finansiranje rekonstrukcije pod nazivom “Program Poslovnog razvoja”;

**Ad. - 1:** Usvajanje Zapisnika sa 13.sjednice Predstavničkog doma

O Zapisniku sa 13.sjednice nije bilo diskusije.

Zapisnik je usvojen sa 37 od 38 prisutnih poslanika, a jedan poslanik je bio uzdržan prilikom glasanja.

**Ad. - 2:** Poslanička pitanja i odgovori

Poslanička pitanja su postavili poslanici kako slijedi:

**Muhamed Begović:**

Ponovo postavio pitanja koja je postavio na 8.sjednici održanoj 17.maja 2001.godine, a na koja nije dobio odgovor (pitanja u prilogu – dobio odgovor samo na 1. pitanje).

**Ibrahim Đedović:**

U ime poslanika: Senada Šarganovića, Branislava Lolića, Dragog Stanimirovića i u svoje, postavio sljedeće pitanje:

Da li i ko, u ime Bosne i Hercegovine, razgovara ili pregovara na temu pristupa BiH Partnerstvu za mir i postoji li određena dinamika približavanja BiH toj organizaciji?

**Mustafa Cuplov:**

Ponovno pitanje: Da li je formirana Komisija za očuvanje nacionalnih spomenika, što je preuzeta obaveza Aneksom VIII Dejtonskog mirovnog sporazuma.

**Osman Brka:**

Šta se radi na nivou država Bosne i Hercegovine i Republike Hrvatske, da se riješi problem Bošnjaka na području Karlovačke Županije, koji u velikom broju žive uz granicu BiH – opština Slunj, Centrigrad, Vojnić i Topusko?

**Zdenko Vukić:**

Kako razriješiti finansiranje predstavnika BiH na sportskim natjecanjima? (konkretan problem: nastup Šahovske reprezentacije BiH (m+ž) na Evropskom prvenstvu početkom 11. mjeseca 2001.u Španjolskoj)?

**Mirko Banjac:**

Na koji će se način i kada vratiti privatna imovina vlasnicima Srbima u Sanskom Mostu na kojoj je zemlji napravljeno 176 privatnih objekata pripadnika bošnjačkog naroda?

**Abdurahman Malkić:**

1. Na jednoj od prethodnih sjednica tražili smo tačku dnevnog reda: Kršenje Odluke Visokog predstavnika o raspolaganju zemljištem u društvenoj odnosno državnoj svojini.

Pitanje: Šta sa informacijom o korištenju Odluke i dokle se stiglo s radom, jer je to bilo obaveza Vijeća ministara za narednu sjednicu?

2. Šta će poduzeti Vijeće ministara na sistemskom sprečavanju nacionalne i vjerske diskriminacije sadržane u nepodnošljivom birokratizmu prema povratnicima, kakav je očit slučaj efendije Hodžića.

**Miloš Jovanović:**

Da li ugovori o razmjeni nekretnina, zaključeni od početka ratnih dejstava do potpisivanja Dejtonskog sporazuma, između ugovornih strana koje nisu boravile u mjestu u kojem je vlasništvo njihovih nekretnina, odnosno izbjegli sa prostora Federacije BiH u RS i obrnuto, proizvode pravno dejstvo, odnosno da li ostaju na snazi?

**Zoran Spasojević:**

Da li može Ministarsko vijeće BiH finansijski pomoći oko projekta kanalizacije grada Bijeljine?

**Željko Bilbija:**

Da li građani BiH koji su 1991. godine zbog rata izbjegli iz Slovenije imaju pravo na povrat stanarskog prava u Sloveniji? Npr. nosilac stanarskog prava na stanu čiji je vlasnik Vojno-stambeni fond bivše JNA.

**Tihomir Gligorić:**

Tražim od Vijeća ministara BiH da mi pismeno odgovori na pitanje statusa i nastavka rada Uprave za geodetske i imovinsko-pravne poslove Republike BiH (naslijeđen naziv), s obzirom da se radi o paralelnoj instituciji, jer po Ustavu BiH ti poslovi su u nadležnosti entiteta, pa se traži odgovor pod kojim uslovima, na koji način i ko finansira navedenu instituciju? Isto se odnosi i na JP Geodetski zavod BiH.

**Salih Kulenović:**

Kada će nas resorno ministarstvo detaljno informisati o tome kako i na koji način se provodi proces povratka, kako se provode imovinski zakoni, kao i odluke OHR-a u vezi s tim?

**Ljubomir Kovačević:**

Kada ću dobiti odgovor na već dva puta postavljeno pitanje: Šta je prethodno i šta će sadašnje Vijeće ministara učiniti na poboljšanju životnog standarda radnih ljudi i građana Bosne i Hercegovine? Koliko će povećati broj zaposlenih? Koliko će povećati prosječnu penziju? Koliko će povećati lične dohotke?

**Franjo Majdandžić:**

1. Stanje privrede, zapošljavanja, privatizacije i plasmana stranog kapitala.
2. Problem otkazivanja stranog kapitala na području Republike Srpske.

**Senad Šarganović:**

Koja institucija na nivou BiH treba da pokrene inicijativu na ispunjavanju osnovnih uslova za BiH potrebnih za pristupanje Partnerstvu za mir: 1) zajednička vojska na nivou BiH – kao prvi korak zajednička komanda; 2) demokratska kontrola oružanih snaga – komisija Parlamenta BiH.

**Halil Mehtić:**

Molim za precizan odgovor na pitanje: Kolika je stranačka zastupljenost imenovanih ambasadora i konzula, kao i drugih funkcionera u DKP?

**Emina Zaćiragić:**

Ponovo postavila pitanje: Postoje li neka sredstva na nivou Bosne i Hercegovine za rješavanje ekoloških problema; ako postoje ko je nadležan da ta sredstva raspoređuje i kako su raspoređena?

**Mediha Filipović:**

Ponovo postavila pitanje: Zašto još nije donesen zakon o ekstradiciji?

**Boro Bjelobrk:**

Zatražio usmeni odgovor od predsjedavajućeg Doma, šta je urađeno povodom njegovog zahtjeva postavljenog početkom maja, da dobije informaciju o događajima u Trebinju i Banjoj Luci.

U okviru ove tačke dnevnog reda predsjedavajući Vijeća ministara Zlatko Lagumdžija zamolio je poslanike da se prilikom postavljanja poslaničkih pitanja pridržavaju odredbi 124-129. Poslovnika Doma. Posebno je skrenuo pažnju na odredbu čl. 126. gdje je rečeno da se pitanja dostavljaju u pisanoj formi najmanje sedam dana prije sjednice, kako bi se mogli pripremiti kvalitetni usmeni odgovori na samoj sjednici.

Predsjedavajući Lagumdžija iznio je i problem nenadležnosti Vijeća ministara u odnosu na pojedina pitanja, pa se u tom slučaju Vijeće pojavljuje kao posrednik prikupljajući informacije od nadležnih organa, što i jeste razlog da prođe više vremena dok poslanici dobiju odgovore.

**Marko Amidžić**

Poslanik Marko Amidžić uputio je Kolegiju Doma prijedlog da se pitanja koja nisu direktno postavljena izvršnoj vlasti ili Predsjedništvu BiH, adresiraju na grupe poslanika iz izbornih jedinica BiH, da oni sa tog terena prikupe prave informacije. Tako bi poslanici odgovorili svojoj poslaničkoj ulozi, bili bi na terenu i uvezivali sveukupno stanje, rekao je Amidžić.

Predsjedavajući Mirjanić je odgovorio da je korektna inicijativa poslanika Amidžića, da se uspostavi što bolji dijalog između poslanika i izbornih jedinica, ali da, što se tiče poslaničkih pitanja, nije u skladu sa Poslovníkom Doma.

Usmene odgovore na pitanja na sjednici dobili su poslanici Mediha Filipović i Boro Bjelobrk.

**Ad. - 3:** Izvještaj Komisije Kolegija o nastojanju za postizanje saglasnosti o Prijedlogu zakona o izmjenama i dopunama Zakona o izbjeglicama iz BiH i raseljenim osobama u BiH

Predsjedavajući Mirjanić je podsjetio poslanike da Kolegij nije postigao saglasnost o Prijedlogu zakona o izbjeglicama iz BiH i raseljenim osobama u BiH, te da Dom treba da se izjasni o Prijedlogu zakona, u skladu s čl. 65. tačka 4. Poslovnika. Upozorio je poslanike da nema rasprave u ovoj fazi postupka. Ipak su diskutovali Mustafa Cuplov, Osman Brka, Mariofil Ljubić, te predsjedavajući Vijeća ministara Zlatko Lagumdžija.

Poslije diskusije predsjedavajući Doma dao je pauzu da bi se sa predsjedavajućim klubova poslanika i predstavnicima Vijeća ministara pokušao naći kompromis kako bi se usvojio predloženi zakon.

Nakon pauze predsjedavajući Mirjanić obavijestio je Dom da su obavljene konsultacije tokom pauze sa predsjedavajućim klubova i predstavnicima Vijeća ministara, ali da nije postignuta saglasnost u vezi s spornim odredbama Prijedloga zakona.

U ime Vijeća ministara ministar za ljudska prava i izbjeglice Krešimir Zubak, obrazložio je zbog čega Vijeće ministara ne bi moglo prihvatiti odredbu koja je predložena amandmanom poslanika Brke, a koja zahtijeva velika finansijska sredstva koja Budžetom nisu obezbijeđena.

Poslije izlaganja ministra Zubaka predsjedavajući je dao na glasanje Prijedlog zakona.

Od 39 prisutnih ZA su glasala 22 poslanika, protiv je glasalo 10, uzdržalo se 7.

Glasajući po entitetima iz Republike Srpske protiv je glasalo 10 poslanika što je dvije trećine iz entiteta.

Predsjedavajući je konstatovao da Prijedlog zakona o izmjenama i dopunama Zakona o izbjeglicama iz BiH i raseljenim osobama u BiH nije usvojen.

**Ad. – 4:** Izvještaj Komisije Kolegija o nastojanju za postizanje saglasnosti o Prijedlogu zakona o međunarodnom i međuentitetskom drumskom prijevozu

Predsjedavajući Mirjanić je obavijestio Dom da je Kolegij postigao saglasnost o Prijedlogu zakona o međunarodnom i međuentitetskom drumskom prijevozu u prvom čitanju i da će se isti razmatrati na narednoj sjednici Doma u drugom čitanju.

**Ad. – 5:** Prijedlog zakona o industrijskom vlasništvu u BiH (prvo čitanje)

Predsjedavajući Kluba poslanika PDP-SNS-SNSD/DSP-SPRS, Željko Bilbija, predložio je da se danas o predloženom zakonu raspravlja o osnovnim principima, dakle u prvom čitanju, ali da se o principima ne glasa. Predložio je da resorna entitetska ministarstva u međuvremenu izvrše dogradnju principa, kako bi na narednoj sjednici Dom glasao o prvom čitanju.

Prijedlog Bilbije predsjedavajući je dao na glasanje.

Od 36 prisutnih ZA je glasalo 12, protiv 21, uzdržala se 3 poslanika. Prema tome, prijedlog nije usvojen.

U diskusiji o Prijedlogu zakona učestvovali su: Mirko Banjac, Sead Avdić, Dušan Stokić, Emina Zaćiragić, Željko Bilbija, Boro Bjelobrk, Abdurahman Malkić, Franjo Majdandžić, Marko Amidžić, Mirko Mijatović, Osman Brka, Mustafa Cuplov, Adem Borić, te zamjenik ministra vanjske trgovine i ekonomskih odnosa Jadranko Prlić.

Poslije diskusije predsjedavajući je dao pauzu kako bi se sa šefovima klubova obavile konsultacije o spornim pitanjima iznesenim u diskusiji.

Nakon pauze, u ime Vijeća ministara, zamjenik ministra Jadranko Prlić predložio je da se rasprava o Prijedlogu zakona o industrijskom vlasništvu u BiH nastavi na narednoj sjednici, kada će možda situacija biti drugačija i kada će se možda raspolagati drugačijom argumentacijom.

Predsjedavajući Doma se zahvalio zamjeniku ministra i konstatovao da je postupio potpuno u skladu sa ovlaštenjima Vijeća ministara koji je predlagač zakona. Naglasio je da se o ovome ne glasa već se samo primi k znanju.

U ime Kluba poslanika SDA Adem Borić je upoznao Dom da je Klub prethodna dva dana tri puta odlučivao o ovom prijedlogu zakona u prvom čitanju i čvrsto stoji na stanovištu da se glasa o istom.

Predsjedavajući Mirjanić je napomenuo da je predlagač Prijedlog zakona povukao s ove sjednice i da se zbog toga ne može glasati. Potom je otvorio sljedeću tačku dnevnog reda.

**Ad. – 6:** Prijedlog zakona o vanjskotrgovinskoj komori (drugo čitanje)

Predsjedavajući Mirjanić je podsjetio poslanike da je Prijedlog zakona skinut s 9. sjednice Doma na prijedlog Proširenog kolegija, a radi dodatnih konsultacija u komorama entiteta.

Mirko Banjac je obavijestio Dom da je imao jedan broj amandmana koje nadležna komisija nije prihvatila i da ih je on ponovo uložio. Naglasio je da je kontaktirao entitetske komore i od istih dobio pisma. Potom je upoznao Dom o stavovima komora povodom njegovih amandmana, te da je, imajući u vidu te stavove, odustao od svih drugih, sem amandmana na članove 2, 22. i 28. Prijedloga zakona.

Željko Bilbija je obavijestio Dom da odustaje od svog amandmana, s obzirom na stavove entitetskih komora.

Predsjedavajući Mirjanić je napomenuo poslanicima da su ostala samo tri amandmana i da se može voditi rasprava samo o amandmanima. Dao je pauzu od pet minuta kako bi se poslanicima ponovo dostavili amandmani Mirka Banjca, kao i stavovi entitetskih komora.

Poslije pauze u ime Kluba SDP-a Bogić Bogičević je, pored ostalog, rekao da Klub SDP-a nije imao amandmana na Prijedlog zakona o vanjskotrgovinskoj komori. Predložio je da se zakon usvoji u istovjetnom tekstu kao što je usvojen u Domu naroda, imajući u vidu da je već dugo u proceduri i da bi, ako bi usvojili predložene amandmane poslanika Banjca, uslijedilo novo usaglašavanje i dalja procedura. S obzirom da je u Domu naroda usvojen amandman koji je identičan amandmanu Mirka Banjca na član 2, Klub SDP-a može prihvatiti taj amandman Banjca, rekao je Bogić Bogičević.

Mirko Banjac je i dalje ostao kod svoja tri amandmana, kako je naprijed rekao.

Predsjedavajući Doma je potom dao na glasanje amandmane.

Amandman na član 2. usvojen je sa 30 glasova ZA, 6 protiv i 2 suzdržana.

Amandmani na čl. 22. i 28. nisu usvojeni. Od 38 prisutnih ZA je glasalo 14, odnosno 15; protiv 23, odnosno 22, a suzdržao se jedan poslanik.

Poslije glasanja poslanik Dušan Stokić u ime Kluba zatražio je pauzu, a nakon pauze Dom je obavijestio da Klub nije spreman da prihvati Prijedlog zakona s obzirom da nisu usvojena dva amandmana koji se odnose na finansiranje i na podjelu imovine, a koje cijene veoma bitnim.

Predsjedavajući Mirjanić je potom dao na glasanje Prijedlog zakona.

Od 36 prisutnih ZA je glasalo 25, suzdržalo se 11. Glasajući po entitetima, iz Federacije BiH ZA su glasala 22, iz Republike Srpske 3 poslanika.

Predsjedavajući Mirjanić konstatovao je da Prijedlog zakona o vanjskotrgovinskoj komori BiH nije dobio entitetsku većinu i da ide na usaglašavanje Komisije Kolegija.

**Ad. – 7:** Izvještaj o izvršenoj reviziji godišnjih računa za 2000. godinu:

- a) Ministarstva civilnih poslova i komunikacija,
- b) Ministarstva vanjskih poslova,
- c) Ministarstva vanjske trgovine i ekonomskih odnosa

U ime Komisije za finansije i budžet zamjenik predsjedavajućeg Ljubomir Kovačević podnio je izvještaj te komisije o razmatranju Izvještaja o izvršenoj reviziji računa za 2000. godinu.

U diskusiji su učestvovali Ramiz Vilić i Dragi Stanimirović.

U ime Kancelarije za reviziju poslovanja institucija BiH govorili su Ivan Miletić, glavni revizor i Samir Mušović, zamjenik glavnog revizora.

Poslije diskusije Dom je prihvatio Izvještaj o izvršenoj reviziji godišnjih računa za 2000. godinu Ministarstva civilnih poslova i komunikacija, Ministarstva vanjskih poslova i Ministarstva vanjske trgovine i ekonomskih odnosa, kao i Izvještaj Komisije za finansije i budžet s predloženim mjerama.

Dom je preporučio Kancelariji za reviziju poslovanja institucija BiH da izvrši reviziju i ostalih budžetkih korisnika za 2000. godinu, a što se tiče 2001. godine, svih budžetskih korisnika zaključno sa kalendarskom godinom, a ne za devet mjeseci.

**Ad. – 8:** Izvještaj o radu Državne granične službe BiH u periodu 1.01.-30.6.2001.

U okviru ove tačke diskutovali su Željko Bilbija, Miloš Jovanović, Tihomir Gligorić, Osman Brka i Abdurahman Malkić.

U ime Državne granične službe govorio je Slaviša Vuković, direktor Službe. Dom je jednoglasno prihvatio Izvještaj DGS.

**Ad. – 9:** Izvještaj Centralne banke BiH za 2000. godinu

Zamjenik predsjedavajućeg Komisije za finansije i budžet, Ljubomir Kovačević, podnio je izvještaj te komisije o razmatranju Izvještaja Centralne banke.

Željko Bilbija je postavio pitanje predstavniku Centralne banke u vezi s odlukom Vijeća ministara objavljenom u “Službenom glasniku BiH”, br. 9/98, vezanom za sredstva Stend-baj aranžmana.

U ime podnosioca Izvještaja govorio je Dragan Kovačević, viceguverner Centralne banke, koji je odgovorio i na postavljena pitanja u diskusiji.

Poslije izlaganja viceguvernera Dom je jednoglasno prihvatio Izvještaj Centralne banke BiH za 2000. godinu.

**Ad. – 10:** Informacija o organizaciji i kadrovskoj situaciji u DKP mreži Ministarstva vanjskih poslova BiH

Povodom Informacije govorio je predsjedavajući Komisije za vanjske poslove Marko Amidžić, koji je iznio niz inicijativa koje su potekle od Komisije.

U diskusiji su učestvovali Halil Mehtić i Mariofil Ljubić. Pored ostalog naglašeno je da je informacija stara već pet mjeseci i da je deplasirana, te da se može samo primiti k znanju.

Poslije diskusije predsjedavajući Doma je napomenuo da su u toku pripreme za raspravu o vanjskoj politici, na osnovu zahtjeva Komisije za vanjske poslove Doma. Ovim je zaključio ovu tačku dnevnog reda.

**Ad. – 11:** Popunjavanje upražnjenih mjesta u komisijama Doma

Na prijedlog Kluba poslanika Stranke za Bosnu i Hercegovinu u komisije Doma su izabrani:

- Emina Zaćiragić, za člana Komisije za finansije i budžet,
- Franjo Majdandžić, za člana Administrativne komisije,



- Emina Zaćiragić za člana Zajedničke komisije Predstavničkog doma i Doma naroda radi postizanja sporazuma o jedinstvenom tekstu Zakona o izmjenama i dopunama Zakona o vanjskom dugu.

**Ad. – 12:** Davanje saglasnosti za ratifikaciju:

- a) Drugog amandmana na Sporazum o grantu između Sjedinjenih Američkih Država i Bosne i Hercegovine za program reintegracije i stabilizacije zajednice,
- b) Sedmog amandmana na Ugovor o bespovratnim sredstvima između Bosne i Hercegovine i Sjedinjenih Američkih Država o programu za finansiranje rekonstrukcije pod nazivom “Program poslovnog razvoja”

Zamjenik predsjedavajućeg Komisije za finansije i budžet Ljubomir Kovačević podnio je izvještaj Komisije o razmatranju amandmana. Pored ostalog, obavijestio je Dom da je Komisija prihvatila drugi amandman, a da je sedmi amandman vraćen podnosiocu radi određenih objašnjenja. Međutim, Predsjedništvo BiH se nije tim povodom oglasilo, rekao je Kovačević.

Diskutovao je Željko Bilbija, koji je takođe podržao drugi amandman. Što se tiče sedmog amandmana, iznio je prijedlog Kluba se odloži njegovo usvajanje dok se u pisanoj formi ne dobiju odgovori na neka pitanja.

Predsjedavajući Mirjanić pozvao je Dom na izjašnjenje.

Dom je jednoglasno dao saglasnost za ratifikaciju drugog amandmana na Sporazum o grantu između SAD i BiH za program reintegracije i stabilizacije zajednice.

ZA ratifikaciju sedmog amandmana, od 32 prisutna, glasalo je 26 poslanika, protiv je glasao jedan, a uzdržalo se 7.

Glasajući po entitetima, iz Republike Srpske ZA su glasala 3, iz Federacije BiH 21.

Predsjedavajući je konstatovao da nema entitetske većine za davanje saglasnosti na Sedmi amandman na Ugovor o bespovratnim sredstvima između Bosne i Hercegovine i Sjedinjenih Američkih Država o programu za finansiranje rekonstrukcije pod nazivom “Program poslovnog razvoja”, te da će se provesti postupak usaglašavanja na Komisiji Kolegija Doma.

Ovim je iscrpljen dnevni red 14. sjednice.

Predsjedavajući Željko Mirjanić se poslanicima zahvalio na aktivnom učešću u radu sjednice.

Sjednica je završila s radom u 19,45 sati.

Sastavni dio ovog zapisnika je transkript 14. sjednice Doma.

**S E K R E T A R**  
**PREDSTAVNIČKOG DOMA**  
**Branka Todorović**

**PREDSJEDAVALAČI**  
**PREDSTAVNIČKOG DOMA**  
**dr. Željko Mirjanić**